



Kako dočekujemo novu hidžretsku godinu? (Meka)

Hatib: dr. Usama ibn Abdullah Hajjat

4. muharemu 1443. po Hidžri / 13. august 2021.

Hvala Allahu Koji je Sunce učinio izvorom svjetlosti, a Mjesec sjajnim, položaje mu odredio da biste znali broj godina i računanje. Hvalim Allaha, Silnoga, Onoga Koji mnogo daruje. Svjedočim da nema boga osim Allaha, Jedinog, Koji druga nema, i svjedočim da je naš prvak i vjerovjesnik Muhammed, sallallahu alejhi ve sellem, Allahov rob i poslanik, najbolji čovjek koji se bojao svoga Gospodara i poslušan Mu bio. Allahu moj, smiluj se, spasi i blagoslovi Svoga roba i poslanika Muhammeda, sallallahu alejhi ve sellem, njegovu porodicu, ashabe i sve one koji ih slijede u dobročinstvu. Bojte se Allaha, o ljudi, i opskrbite se najboljom opskrbom kojom ćete uspješno preći dionice svoga života i postići Allahovu blizinu na Dan povratka.

O muslimani, ispraćaj prošle i doček nove godine prilika je da oni koji su razumom obdareni zastanu, razmisle, uzmu pouku i pogledaju sunce koje izlazi svakog dana na istoku i zalazi na zapadu, i pogledaju mjesec kada se tek pojavi kako je tanak, a onda nakon što se upotpuni, opet počne da se smanjuje, sve dok se u potpunosti ne izgubi iz vida, da razmisle o novoj godini, čiji im se kraj u početku čini dalekim, a zatim njegovi mjeseci i dani prođu kao tren i dođe kraj godine. Tada će shvatiti da je upravo to primjer dunjaluka, u njegovom sjaju i ukrasu, i primjer čovjekovog životnog vijeka u iščezavanju i prolasku, i to je činjenica koja nije skrivena nijednom pametnom čovjeku, s tim da tu činjenicu, kod nekih ljudi, pokrivaju zastori nemara, i od nje odvrćaju samoobmana, duga nada, lažna nadanja i pretpostavke koje nemaju veze sa realnošću. Shvatanje ove istine trebalo bi ih podstaći da pogledaju iza sebe, analiziraju svoja djela u prethodnoj godini i svedu račun sa samima sobom, kako bi popravili ono što su pokvarili, nadoknadili ono što su propustili i ispravili ono što su krivo učinili, a da ustraju na Pravom putu i čvrsto se drže istine ako su bili od dobročinitelja i upućenih. Ono što će im na najbolji način pomoći u tome jeste





iskrena tevba – pokajanje, koju je Allah naredio svim vjernicima, kur’anskim ajetom: “I svi se Allahu pokajte, o vjernici, da bi ste postigli ono što želite” (En-Nur, 31), i kajanje zbog onoga što je prošlo, ostavljanje grijeha, čvrsta odluka da se neće vratiti grijehenu i iskorištavanje pet stvari koje je oporučio Vjerovjesnik, sallallahu alejhi ve sellem: “Iskoristi pet stvari prije pet drugih: mladost prije starosti, zdravlje prije bolesti, bogatstvo prije siromaštva, slobodno vrijeme prije zauzetosti i život prije smrti.” (Hakim, Mustedrek, s vjerodostojnim senedom)

U mladosti, zdravlju, bogatstvu i slobodnom vremenu kriju se snaga, odlučnost, aktivnost, posvećenost i usmjerenost ka svakom dobru, a u njihovim suprotnostima je slabost, neodlučnost, tjeskoba u prsima, neaktivnost, teret, mnoštvo obaveza i rastrojenost koji čovjeka odvrćaju od svega toga i zagorčavaju mu život. Zbog toga je pametan čovjek uvijek na oprezu i budno pazi da mu ne izmakne nijedan trenutak života, bilo odgađanjem, koje troši ljudski život, a ne donosi mu nikakvu korist u vjeri i na dunjaluku, ili neznanjem koje ga navodi na slijeđenje strasti, zbog nepoznavanja onoga što mu koristi i šteti, i njegovo stanje najsličnije je stanju onoga ko se našao u tminama iz kojih nikako ne može izaći. Trud takvog čovjeka uzaludan će biti i njegova će djela propasti.

Najbolje čime možemo dočekati novu godinu jesu pokornost Allahu i razni oblici dobrih djela, prije svega: post u Allahovom mjesecu muharremu, koji je najvredniji post nakon ramazana. Poslanik, sallallahu alejhi ve sellem, rekao je: “Najvredniji post nakon ramazana jeste post Allahovog mjeseca muharrema.” (Hadis)

Najprিতvrđeniji post u mjesecu muharremu jeste post Dana Ašure, za koji je Vjerovjesnik, sallallahu alejhi ve sellem, rekao: “Post Dana Ašure nadam se da će iskupiti čovjekove grijeha iz prethodne godine.” (Muslim) U ovom mjesecu činite što više dobrih djela, koja će vas približiti vašem Gospodaru, i kojima ćete ispuniti vaše vrijeme onim što će vam donijeti radost kada sretnete svoga Gospodara. Početi novu godinu pokornošću, završiti godinu hadžom, umrom i postom Dana Arefata za one koji nisu bili na hadžu, i drugim oblicima pobožnih djela, pokazatelj je da je život muslimana, od početka do kraja, ispunjen pokornošću Allahu i Njegovim





spominjanjem. “Reci: ‘Klanjanje moje, i obredi moji, i život moj, i smrt moja doista su posvećeni Allahu, Gospodaru svjetova.’” (El-En’am, 162–163)

Neka brz protok dana i godina bude najbolji podsticaj vama da uzmete pouku i razmišljate o isteku rokova i prolaznosti života, činite dobročinstvo sebi kontinuiranim propitivanjem i obračunom vlastite duše, njenim održavanjem na Pravom putu, odvrćanjem od grijeha i izbjegavanjem oponašanja onih na čije nas je stanje Allah upozorio, a čija su srca vremenom otvrdnula, o čemu Uzvišeni kaže: “Zar nije vrijeme da se vjernicima srca smekšaju kad se Allah i Istina koja se objavljuje spomene, i da oni ne budu kao oni kojima je još davno data Knjiga, pa su srca njihova, zato što je proteklo mnogo vremena, postala nemilosrdna, i mnogi od njih su nevjernici.” (El-Hadid, 16)

Sjetite se dolaska pred svog Gospodara i stajanja pred Njim na Dan velikog straha: “Oni misle da se dogoditi neće, a Mi znamo da sigurno hoće, onoga Dana kada nebo bude kao talog od zejtina, a brda kao vuna šarena, kada bližnji neće bližnjega ništa pitati, iako će jedni druge vidjeti. Nevjernik bi jedva dočekao da se od patnje toga Dana iskupi sinovima svojim, i ženom svojom, i bratom svojim, i porodicom svojom koja ga štiti, i svima ostalima na Zemlji – samo da se izbavi. Nikada! Ona će buktinja sama biti koja će udove čupati, zvat će onoga ko je glavu okretao i izbjegavao i zgrtao i skrivao.” (El-Mearidž, 6–18)

Molite Allaha da dane koje dočekujete učini boljima od onih koji su prošli, i da novu godinu učini godinom dobra, dobročinstva, bogobožnosti, pobjede, uzdizanja i ponosa ummeta najboljeg čovjeka i Poslanika, alejhis-salatu ves-selam.

O vjernici, vjernik koji moli svoga Gospodara Vjerovjesnikovom dovom: “Allahu moj, učini moj život povećanjem svakog dobra, a smrt odmorom od svakog zla”, nastoji iskoristiti priliku života u činjenju svakog dobra i onoga čime je zadovoljan njegov Gospodar, i onoga što će povećati njegovu vrijednost i njegov život učiniti ljepšim. I zato se vjernik raduje blagodati produženja života i svakoj novoj godini koju dočeka, jer u tome vidi priliku za povećanje dobrih djela koja će ga približiti njegovom Gospodaru i dati mu priliku da nadoknadi ono što je propustio i prema





čemu je bio nemanan, iskrenim pokajanjem i predavanjem Božijoj volji, a to je potvrda riječi Poslanika, sallallahu alejhi ve sellem: "Vjerniku produženje života ne povećava ništa drugo nego dobro." (Muslim)

Bojte se Allaha i zahvaljujte Mu što vam je dao priliku koju nije dao mnogima čije su stranice života zatvorene, koji su pokriveni zemljom, pa nisu upotpunili prethodnu godinu, a bili su potpuno zdravi, ispravnog vida i sluha. Hafiz Ibn Redžeb rekao je: "Neko je usnio jednog dobrog prethodnika, pa mu je rekao: 'Kajemo se zbog velike stvari: znamo a više nismo u stanju da bilo šta uradimo, a vi radite a ne znate. Tako mi Allaha, jedan ili dva tesbiha (subhanallah), rekat ili dva rekata u stranicama naših djela draži su nam od dunjaluka i svega na njemu.'"

Neki učenjaci iz prvih generacija kazali su: "Svaki dan koji vjernik živi je dobitak." Iskoristite, o vjernici, priliku nove godine za povećanje činjenja svih vrsta dobrih djela i bit ćete od onih koji će postići ono što žele, a čuvajte se upropaštavanja dana i noći kao što to rade nemarni.

Uvijek imajte na umu da vam je Allah naredio da donosite salavate i selame na pečata svih poslanika, Muhammeda, sina Abdullahova, sallallahu alejhi ve sellem, pa je rekao: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

